

Lelaki abai anak sehingga lemas didakwa

Tertuduh bagaimanapun mengaku tidak bersalah setelah pertuduhan dibacakan kepadanya

Oleh Reno Benjamin

SIBU: Seorang lelaki dihadapkan di Mahkamah Sesyen di sini, semalam atas tuduhan mengabaikan anaknya yang berusia dua tahun sehingga menyebabkan mangsa lemas setelah terjatuh ke dalam longkang tertutup di tepi Jalan Dr Wong Soon Kai pada 4 Ogos lepas.

Ling Hoe Hook, 54, bagaimanapun mengaku tidak bersalah setelah pertuduhan dibacakan kepadanya di hadapan hakim Musyiri Peet, yang turut menetapkan 30 Oktober ini sebagai tarikh pengurusan kes.

Sementara itu, tertuduh dibenarkan bebas dengan ikat jamin RM7,000 dengan deposit sebanyak RM5,000 berserta dua penjamin yang beralamat tetap di Sibu.

Terdahulu Timbalan Pendakwa Raya Cynthia Emmelda Jerry memohon kepada mahkamah agar mengenakan ikat jamin RM10,000 dengan dua penjamin terhadap tertuduh.

Namun peguam bela Jessie Wong memohon agar ikat jamin terhadap tertuduh dikurangkan kepada minimum RM1,000 memandangkan tertuduh telah berusia 54 tahun dan tidak bekerja.

“Namun disebabkan kejadian itu, isterinya kini telah berhenti bekerja dan pulang ke Malaysia dan kedua-dua mereka kini tidak bekerja.”

Jessie Wong
Peguam bela

Ketika kejadian katanya, tertuduh terpaksa menjaga tiga anaknya termasuk mangsa sementara isterinya bekerja di Singapura.

“Namun disebabkan kejadian itu, isterinya kini telah berhenti bekerja dan pulang ke Malaysia dan kedua-dua mereka kini tidak bekerja. Tambahan dua lagi anak mereka berusia satu dan enam tahun telah diserahkan kepada suami isteri ini untuk dijaga,” ujarinya.

Mengikut pertuduhan, Ling didakwa mengabaikan anaknya dengan membiarkan mangsa tanpa pengawasan sehingga menyebabkan anak itu lemas setelah terjatuh ke dalam longkang tertutup di



DIKAT JAMIN: Tertuduh keluar dari kamar Mahkamah Sesyen di Sibu, semalam setelah didakwa atas tuduhan mengabaikan anaknya sehingga menyebabkan mangsa lemas.

tepi Jalan Dr Wong Soon Kai pada 4 Ogos 2025, kira-kira jam 6.20 petang.

Sehubungan itu, tertuduh telah melakukan kesalahan yang boleh dihukum di bawah Seksyen 31(1)(a) Akta Kanak-Kanak 2001, yang mana sabit kesalahan boleh dikenakan denda sehingga RM50,000 dan penjara tidak lebih 20 tahun atau kedua-duanya sekali.

Berdasarkan laporan akhbar sebelum ini, ketika kejadian bapa mangsa membawa anak-anaknya yang masih kecil itu pergi mengutip kotak dan kad bod terbuang di kawasan komersial terbabit hampir setiap hari.

Mangsa yang berusia dua tahun dikatakan keluar dari kereta untuk mencari bapanya namun terjatuh ke dalam

lubang longkang yang tidak bertutup itu.

Pusat Gerakan Operasi Bomba Sarawak menerima panggilan kecemasan pada jam 6.29 petang dan mangsa ditemui terapung di dalam longkang pada jam 6.55 petang.

Mangsa disahkan meninggal dunia di tempat kejadian oleh paramedik Kementerian Kesihatan Malaysia.